

2 TIMOOTI

Timootina inaaqianna rumamaqoo akarafa.

¹ Anutuna ufasaa asaku mundirana Yisufa nari ufara diqigoosa maqasaa fasiqa Pauroosa maridaqa. Yisufa naaru naaru marirana qima afeekaikammandee qimiraree qimaqoona mifa nariki asaku mundirana Yisunaki maridanoo maasa minaki oonu maridaqa mi naaru marirana maraanaura.

² Oo Timooti anee qini qifaaqasaa qimaakuara foora marianafa qinee maa akarana ani rumamaqaidaqa. Maasa aiqamausa faqa aiqama ainaina faqa nikoofa Anutufa faqa maasa karaambaiqa asaku mundirafa Yisufa faqa nari afaarirana faqa amuqusifanoo nifauarana faqa aundurari asoarana faqa ani amiani.

Pauroofa Timootinara dufi dufi qidanoo pood-uamamaqanau.

³ Qini qikeeku qikaaku sia moo ainaina rafaqafinuu Anutuna sandufamau amiqimasee fidaqa maqee maqee Anutunara innaaru qimariqau. Qinee faqa miqi kai masee misa naanna ramasee maqee maqee innaaru qidaqa aniara Timootinara dufi dufi qidaqa. Oo Timooti ani anoofa Eeunisa nammarifa faqa ani ataatoofa Rooisa nammarifa faqa miqanda noori kandamasee Yisunasaa amiqimasee muniqqa mariqau. Maqee anee faqa miqanda naanna ramasee mi oosanna kai maree mariana qinee

iridaqa qafaidaqa. Mi irirafa kaqi aniki marifaqa qinee iridaqa.

⁴ Qinee ani quqasee fuafannana qiniara anee ikiraqoonnanara qinee minara iridaqa qinee faqa aniara didimarifaqa kasoqaqee ani qafamaseeqa firaaqoo asasianaurannoo.

⁵ Qinee aniara firaaqoo eendaki faqa faasaana faqa innaaru qimamaqaidaqa aniara dufi dufi qidaqa.

⁶ Minara qinee maana qimamidaqa ooqai qinee sindimeera foora ani quqamaqaafananoo Anutufa ani amu afaaqooqana anee amiqimasee rakisiinana kuqua.

⁷ Anutuna maraquna maasa qimufa sia maparaairana rufiarana qimidanoo, mina maraquna fannoo afeekaikirana faqa faiqi aanaaseera amuqusirana faqa qeeqa daundurai qimanasaa andeeqasee rakisirana faqa maasa qimidanoo.

⁸ Minara irisee maasa karaambaiqara sia asaurua. Qinee Pauroosa minasaara karabusaki marunнанara faqa sia asaurua kaqi paasoosamasee qimannimia. Anee faqa miqi kai inana Anutufa afeeka amiqaina anee faqa Yisuna amiqira fasaasa ufara kaqi aupuraranaki keeqaa.

⁹⁻¹⁰ Anutufa maasa asumu mareenoo maasa daaramasee mai aniannee qimasee qini faiqi anaasee uqanna mariafaqee qidanoo. Sia maasa oosana moo ainaina amiqirana qafeenoofau maasa asumu mareenoofau. Nari irirana nari afaarirana minannai kai miqinoo. Ooqai maa maqa maaqana faqa innaaruna faqa sia maru

aukuanna narí mi afaarirana maasara narí asauku mundirana Yisunasaa quqaqoofanoo maqee maa aukuanma maasa asumu maree marifa asauku mundirafa Yisufa maa maqanasaa kooroomafinoo mi afaarirana maasa faiqí faiqi qiminau. Asauku mundirafa Yisufa kuqirana aru taikaseenoo narí amiqira fasaasa ufannai kaqi marirana faqa naaru naaru marirana faqa koorooinoo marifaqa maridaqa.

¹¹⁻¹² Qinee sia fifau oosana oosana aupurarana karabusaki maridaqau maraidau, Anutufa diqiqoofaqa maa maqanasaa qinee mina ufa faiqí anaasee naamua qidaqa Yisuna amiqira fasaasa ufa kooroomannimidaga qimannimunnanara aupurarana qeeqa qifaaqasaa maraidaga. Sia qinee minara qisauridaqa. Qinee qeeqa irirana irira fasiqasaa mundusauna maridanoo, qinee minara maana amiqimasee iridaqa, Yisufa narí afaaqooqa qimuna sia kadiqaannoo mifa amiqimasee dadaaqinoo fifi inoo narí qumira aukua paquriannoo.

¹³ Oo Timooti qini kuqaa anoona ufauqa anee karaambaiga ufara foora mina afaqama-ree fua. Maasa asauku mundirana Yisunaki keeqafi marifanoo mifa Anutuna saqarikirana faqa faiqí aanaaseera nimuqusirana faqa maasa qimidanoo anee minaki maria.

¹⁴ Anutufa oosana oosana amiqira irirana anisaa quqaqoona mina naaquqara maraquna fannoo aniki marina mi afeekanannai mi oosana oosana irirana amiqimasee rakisia.

¹⁵ Oo Timooti anee maanara irimariananoo. Misa qini Roomma maqanna ruumbeegee

karabusaki quqasoofaqa aiqama Asia maqa maaqakina qini qiqoondiuqa qini minnisee quqasee sandamafiqau. Fikeerusafa faqa Qeeramookeenesafa faqa miqanda faqa quqasee sandaqau.

¹⁶⁻¹⁷ Oonesifoorusafa mifa kai sia qinee karabusaki mariafannanara asaurinau. Roomma maqusai firaa taunna marufanoo qini sia dauni paqurinau anireenoo qiniara fiqumai faiqu fumandee randaseenoo paqurimandee moomoo kari qini dadaaqimarinau. Qinee karaambaiqara mi fasiqana aiku asaukuara amiqi amiqi mannisaannee qidaqa.

¹⁸ Qinee karaambaiqara nari qumira faasaanasaa mi fasiqanara afauaanee qidaqa innaaru qidaqa. Qinee Efeesusu maqusai mariafananoo mi fasiqafa Oonesifoorusafa firaaqoo qini dadaaqiufa marifana anee Timooti anee minara irimariananoo.

2

Pauroofa Timootinara anee Yisuna amiqira sundiara maqi mariannee qinau.

¹ Anutuna afaarirana dadaaqirana asauku mundirana Yisunaki mariainainafa marinaqa maasa minaki mariananoo maasaindi mariananoo. Oo Timooti mi afaarirana maraseenana minasaa mapukina maria.

² Qinee moomoo fasiqa anaasee nifusaa ufa nimiafannana anee faqa mina irimariananoo. Mi ufausa maramareenana andeeqara fasiqauqasaa quqasainaqa misa qumareeqa quandafi niqoonausa faiqi anaasee qimannimiaqera.

³ Anee faqa asauku mundirana Yisuna rakira faiqiara foora maridana aupuraidana anee faqa kadaapirina fua. Timooti anee rakira fasiqa oosana iria.

⁴ Sundiauqa rakiranaki fidaqa sia kaiqeesa maria marirana maridaqa nariqa aiqama ainaina minniseeqa doo rakira ainainara kai noori faqa irirana minni kai ubeekamasee nari karaambaiqa afusaa afeekaikamaseenoo rakirara kai iridaqa. Timooti anee faqa Anutuna saikaki fidana misa naanna raa.

⁵ Kafaa sandee maria fasiqausa oosana iri-mariana sia ufamau sandeenana taikara qoo oonu kasoomafinana sia feefauru mareennaranoo Timooti anee faqa mi ufamau sandeera foora amanamasee qafa.

⁶ Sia moo fannoo fukasaa narana unakusee naannoo. Narana ummaqi mari fasiqafa mifa kai indaaru unakusee naannoo mina kadaapirirana akiaga mariannoo. Anee faqa Anutuna saikaki kadaapirina fifi inana naaru unakuseena sugaseenana neera foora innaranoo.

⁷ Anee mi ufana qunnana irisainanoo karaambaiqa fannoo dadaaqinana mi oosanna irinnaranoo.

⁸ Aneenna aaqooki asauku mundirana Yisunara iria, mifa Dafidina ati kuqiranakiqari findifufa maridanoo. Mina amiqira fasaasa ufa qinee qimannimi marunnana mina koorooidanoo.

⁹ Qinee mi amiqira fasaasa ufana qiman-nimunnanara aupuraidaqa. Misa qiniara mandoosana maree mari fee qimaseeqa qini qumareeqa sainandannai rumba quqeeqa. Kuqaa qi-

nee sainandannai rumbaqa marida Anutuna ufa fannoo sia rumbanoo maridanoo kaqi idukinoo maridanoo.

¹⁰ Qinee minara iriseeqa, Anutufa rusandeesamumasee mareefandinna fasiqa anaaseesara irisee misa Yisunara iriaqeera oosana oosana mandainaina aiqama ainaina maraidaqa. Misa faqa asumu mariaqeera faqa naaru areenarana maraaqeera faqa mandainaina kaqi qeeqa qipatasaa maraidaqa. Mi asumu marirana faqa naaru areenarana faqa asauku mundirana Yisunaki kai maridanoo.

¹¹ Maa ufafa kuqaa maridanoo. Maasa Yisuna faqa kuqiqa mina faqa findifuanauranoo.

¹² Maasa mina faqa afeekaikamande fifi inaqa maasa kasooqagee mina faqa rakisirausa mariana. Maasa minara qaoo qiananoo mifa maasara faqa qaoo qiannoo.

¹³ Maasa mina akaru qiananoo mifa kai amana kai andeeqasee mariannoo. Mifa sia amana nari oosana minnisee maasa mandoosanamaufannoo, andeeqarafa kai maridanoo.

Pauroofa Timootina aakapanau, amiqimasee ainainianne qinau.

¹⁴ Timooti mi ufausa ani Yisuna ufara suqimaria maqanaki keeqee mariasa qimannimidana maa ufana faqa Anutuna afusaa oori kandamasee aaquqimannimaqa. Misa sia kai fifau ufara tinoo taanoo riqa rairaiqiqa. Mi oosanafa sia anonaikidanoo faiqi anaasee kuridi mariafa mi oosanafa maridanoo

¹⁵ Anee aneennara Anutuna afusaa anee afeekaikamandee maridana saika maree

mariananoo Anutufa aniara maaqi qianifeera oo maa fasiqafa amiqimmandee qini saika uqeeraidanoo qini anoona ufa amiqimasee andeeqasee qimannimimarifa sia narí saikara oonumafi irinoo asauruanifeera.

¹⁶ Akaqausa ooqai Yisuna ufaki mariusa oosana oosana fifau faafau ufa uqeeree mariafaqa anee minara eerairia. Anutuna andeeqarufa sia minaki mari ufana dapi ufa narí qimami narí qimamira fee qinnufana faqa furufarira ufara faqa anee minara rufiasee nianasaa fua. Mi ufafa faiqí anaasee Anutufinnaindaraana mareeqee kaqirunna ubeekemarifa maridanoo.

¹⁷⁻¹⁸ Mi dapi ufana qimannimimariasa ufa fannoo fidika namuanara foora firaqoo amaqi naidanoo firaqoo qaidanoo mi dapi ufana miqi qifanoo firaanaikiandoora. Miqira ufa qimariasa nuqu Qimeenaiusafa faqa Fireetusafa faqa miqanda anoona ufa qimaria aana minnisee unna qimasee aiqamausa kuqiranakiqari findifirafa ooqai taikanoo maridanoo fee qidaqa. Miqira ufannai Yisuna ufamau fimariasa akaqausa nikuamannimiafaqa saamuridaqa.

¹⁹ Misa miqira ufa fannoo sia amana Anutuna ufa aruannoo, faakanara foora arufinoo sia kasiannoo. Mi faakannasaa maa ufana akara rinoo maridanoo Karaambaiqa narí faiqí aanaaseera iridanoo. Ya faiqí anaasee fee nariara karaambaiqaindi fee qinafa mifa mandoosana ameesuquseenoo andeeqara oosana maraannoo. Anutuna ufa faakanara foora marina oosana miqi mminoo maridanoo.

²⁰ Ainaina faqaasa maaqaki qafee disa kaafaina

piritaina oosana oosana maridanoo. Akaqana siruaannai auqirafa maridanoo akaqafa koorannai auqirafa maridanoo akaqafa saqarinnai auqirafa maridanoo akaqafa maqannai auqirafa maridanoo. Akaqana amiqira difaaniki narana saka faiqí nimimariafa maridanoo. Akaqausa mandaikirafa kai madaapeenni marifa maridanoo.

²¹ Faiqí moo fannoo madaapeenni mari difaanifara foorá marifa narí anukamasainanoo ainaina saka neemaria difaanifara foorá amiqirafa mariannoo. Miqinanoo mina akoofa mareeqee amiqira saikaki quqaannoo.

²² Nimuqusa anukarausa maqee maqee karaambaiqa aaraidaqa dadaaqiannee qidaqa anee misa faqa misa naanna raidana kumaaraa mandainainara nidiranara eerairiaqa andeeqaranara afeekaikamasee afaqaaqa, Yisunasaa irirana rusirana faqa faiqí aanaaseera nimuqusirana faqa naunduraki asoarana faqa afeekaikamasee afaqaaqa.

²³ Furufarira ufa, dapi ufa rainarafa minauqara eerairiaqa. Miqi qimariasa aiqama kari aanooqiranaki aqufidaqa.

²⁴ Anutuna ainainira fasiqa fannoo sia ufa rainainnanaki keeqaani. Mifa aiqamausara reen-deenamandee ireeda kai qimannimiani mifa amiqimasee ireeda kai fifimmasee Anutuna ufa naamuaqiani.

²⁵ Mifa ireeda kai mina ufara qaoo qimariasa andeeqannimaqaani. Mifa miqinanoo abee Anutufa dadaaqiannoo fee misa quandaki anoona ufai ubeekeefaranoo fee.

26 Sadannafa nárí ufaanaki mara arinoo nárí iriranamau quqasoofaqa fimarufaqa misa anoona ufasaa ubeekaifanoo nári irirafa kambiqafinaqa Sadannana ufaanakiqari aruruduku fifaranoo.

3

Pauroofa taikara aukuanara Timootina qimaminau.

¹ Oo Timooti anee maa ufana aaqoo iria. Taikara aukuana manda aukuana afeeka aukuana mariannoo.

² Mi aukuanna mi kamuqoo faiqí náriara kai irifaranoo kaaqa ainainara rimarifaranoo, náriara firaqoo ufa qimarifaranoo, firaqoo náriara nári nimooqimarifaranoo, misa mandufa faiqí anaasee qimannimi marifaranoo, misa nári nin-
ausa nikausa ufa rukieefaranoo, misa nimira ainainara sia dufi dufi qifaranoo kai mareefaranoo, sia Anutunara irifaranoo mana mana kaimmifaranoo.

³⁻⁴ Sia faiqí anaasee reendeenama nimaqee-faranoo. Sia faiqí anaasee nifauueefaranoo. Misa moosara munuqi miniqifaranoo. Kaaqa faiqí narimarisa kaasau fainiara foora kaaqa faiqí narimarifaranoo. Misa andeeqarausara fidi-aqaammifaranoo. Misa kaaqa faiqiara ueeqee mariasa misa irirana siaisa kaqi minaki ra-keemasee fimariasa misa kaaqa nári nimooqiqa nári nuqu uqeeree mariasa. Misa niqaara ree mari ainainnara kai riqa Anutunara sia rifa-ranoo.

⁵ Misa amaana ufa sia irifaranoo nipatakai qumareefaranoo, anoona amuqusakinaana sia

qumareefaranoo. Timooti anee miqi mariasara eerairamandee nianai maria.

⁶ Misakiqari akaqa fasiqauqa nariqa unna amaana ufa qianeera furufari maria anaaseesa mandoosana maree maru anaaseesa maaqaki oonureeqa unna amaana ufa qimannimiseenoo misa afapita qumareenoo misa firaafaikinoo marifaqa mi irirana siai anaaseesa nári oosana oosana mandainaina nidudusaa aruqaafanoo innee doo mi mau kai fuagee qifaqa mi mau kai fidaqa.

⁷ Miqimari anaaseesa Anutuna ufa anoonara maqee maqee oosana oosana amaana ufaki randaidaqa sia anoona paquridaqa.

⁸ Ooqai Mooseefa Isipa maqusai Faraona asaukukinaana Isarae maqannaasa idukumaree fuaneera qufanoo Faraona afunee fasiqaqanda nuqu Yaneesafa faqa Yambareesafa faqa miqanda Mooseena itita amaqaqau. Maa maqee maria unna amaana ufana qimariasa misa miqanda naanna raidaqa, Anutuna anoona ufa ititaidaqa. Misa Anutuna anoona iriranara kadiqaidaqa oorudupidaqa misa mi irirafa kuqiara foora inoo maridanoo sia kasidanoo.

⁹ Ooqai Mooseena aukwana Yaneesasa Yambareesasa miqanda furufarirana aiqamausa qafamasee misa ufa minnisaqau. Maa maqee maria unna amaana ufana qimariasa aiqama sia misa ufa irifara, misa furufarirafa akooqoo marifaqa minniseefara akaqausa kai irifaranoo.

Pauroofa taikara naamuaqira ufa Timootina qimaminau.

¹⁰ Oo Timooti anee sia miqi marianafa anee qini naamuaqira ufamau kai fimarianafa qini oosana maree marianafa qinee fimarunnaqoo kai anee fimariananoo qinee Yisuna anoona ufamau fimariafannana anee qiqafoonafa mariananoo Anutuna saikasaara daruafaqa sia ra-keemasee minniseeqa reendeenamandee kaqi miqoo marunana anee qiqafaananoo. Qinee faiqi aanaaseera qimuqusi mariafannana anee mina faqa qiqafoonafa mariananoo. Qinee kisaqasaa Anutuna aanara afeekaikirana anee qafaananoo.

¹¹ Qinee Anutuna ufaaara darirana faqa aupurarana faqa mareemarunana anee qafaananoo. Qinee Antiooka maqusa faqa Ikooniumma maqusa faqa Ristara maqusa faqa mi maqusanakiaqa fimariafanaqa misa dariqa fimarufaqa firaqoo aupuraqa fimariqiafana. Anee minara faqa irimariananoo. Karaambaiga fannoo mi ainainnakinaana qini asumu mara quqasoofaqa maridaqa.

¹² Aiqama maqasaa qaraasa asauku mundiranasaa irirana rusiseeqa miqooqari Anutuna andeeqara oosana maraifaqa narirana aupurarana mareefaranoo.

¹³ Mandoosana maree mariasa faqa unnaqi maria fasiqausa faqa nári mandoosana maraqa fidaqa ootupaqa fidaqa miqiqi fifi ifaqa firaanaikifaranoo. Misa akaqausa nikaru qiafaqa kafa misa quandaki nári faqa nikaru qifaranoo.

¹⁴ Oo Timooti anee sia misa naanna reemariananoo. Qinee Anutuna anoona ufa ani aamuaqiafannana amiqimmandee qumaroonnana mi mau kai amiqimasee fua. Anee yanasaqari

fee Anutunaindaraa ufa irira oosana mareenane. Doo miqikaimmasee mi fasiqafa indee kai inana naaru naaru miqi kai ia.

¹⁵ Oo Timooti anee aanaaqisaa Anutuna naaquqara akarakinaa ufa irimarianafa mariananoo anee minara faqa iria sia aunua. Mi naaquqara akararufafa asumu marira irirana ani amiannoo. Mi asumu marirafa asauku mundiranaki maridanoo.

¹⁶⁻¹⁷ Anutufa qimannimufaqa akara rumaqoo ufafa maridanoo Anutuna ufa qimannimimaria fasiqausa mina qumaraifanoo minakinaa ufa fannoo nári naamuaqiannoo nári aaqaranara qaoo qiannoo, nári eendaandirana andeeqaannoo nári andeeqasee firana naamuaqiannoo. Miqi qimasee Anutuna ufa qimannimimaria fasiqausa andeeqasee amanaikinaqa Anutuna saika oosana oosana uqeeraaqa.

4

Pauroofa faiqí anaasee qimannimira oosanara Timootina qimaminau.

¹ Oo Timooti qinee Pauroosa Anutuna afusaa faqa asauku mundirana kuqirausa faqa kaqi mariasa faqa aaquqimannimaqee marina afusaa faqa doori kandamasee ani faqa aaquqimaqaidafa. Yisufa kaifaa kooroomafi aiqamausa rakisianinnanara iriseeqa ani aaquqimaqaidafa.

² Anee Yisuna amiqira fasaasa ufara faiqí anaasee qimannimia, narí qanaa fee kaqiqoo fee sandanainai qimasee qimannimia, anee misa iriaqa iaqee qimasee qimanniminaqa misa iriaqa

anee mandoosana maree mariasara qaoo qia, anee faiqí aanaaseera nifeeqaraidana poodua. Anee ubiqafi sanaasamasee faiqí anaasee qiman-nimia.

³ Qusasaa sia anoona ufa naamuaqirana ir-ifaranoo misa nári manda nidimari ainainna kai afaqee fidaqa nári naaqookinaa manda irirana naamuaqimariasaa misauqa kai moomoo nifiqasee innee mi manda irirausa kai qimaqimi-aqee qifaranoo.

⁴ Misa anoona ufara nimeesuqusee kai fifau uriara kai naaqoo rammardini imariasaa.

⁵ Timooti misa miqimarifana anee aneenna ka-soomambi ubiqafinana misa ani ariranee aupuraranee amimarifana kaqi kai fua. Amiqira fasaasa ufa naamuaqira saika maqee maqee marana fua, anee aneenna aiqama saikaki maridana Anutuna ainainira faiqí maridaqee qimasaidana marana fua.

⁶ Oo Timooti anee iria doo qini fidika ruqiqa qimaqee fandinnafa doo ani maridanoo. Doo qusasaa misa qini darifaqa qinee maa mariranakiqari doo taikasee fifuanauranoo.

⁷ Doo qinee amiqira rakiranakiara foora rakumaree uriqaramafiara foora mafiqa. Doo narí amani narí amanira sandaranaki qimudaanaiqimaseeqa sandaqa aniifaqa doo taikarana paquriqa. Qinee Anutuna ufa faqa marirana faqa andeeqasee qumaree sandeeqa taikarana aniree paquriqa.

⁸ Doo maqee sandaida uriqareemariasaa feefauru qiniara deedaqinoo maridanoo. Karaambaiqa andeeqasee ufa nimirifa

qumira faasaana andeeqeemariasaa qafee qini qikiaaqa afisuannoo. Mikari sia qini kai qimiannoo, moomoosa minara nidimarisa mina koorooiranara afeesidaqa nidimarifaqa afeesimariasaa misa faqa nimiannoo.

Pauroofa Timootina qimaminau, qini qamunna papiqa maree mini qimia.

⁹ Oo Timooti anee kaqi kaqi mindari aniree qiqaafaa.

¹⁰ Deemasafa maa maqa maaqanakinana ainainara kaaqa ridanoo qini minniqiseenoo doo Teesaroonika maqusai finoo Kareeseenasa doo Karatia maqa maaqai finoo, Titusafa Daramatia maqa maaqai finoo.

¹¹ Rukaafa sia rumberanaki marifa kaqi marifa mifa kai qini faqa maridanoo. Anee Marikoona afigee minisainanoo Anutuna saika qini dadaaqiani.

¹² Tikikusafa qini faqa marina qinee doo aqiqaunanoo Efeesusa maqusai finoo.

¹³ Qini suara qamunna Tarooasa maqusai faiqi moo auqu Karapoosana maaqaki quqaqaafannana anee aninana aimaree ania. Qini papiqauqa faqa qini akara papiqa faqa aimaree mini qimia.

¹⁴⁻¹⁵ Areesandeerafa mifa qainna faqa koopaa faqa auqimarifa mifa nari mandoosana maareenoo qini firaqqoo mandaikamaqimaqeenoo, mifa firaqqoo maasa qimannimira ufara akooqaidanoo anee faqa firaqqoo minara eerairia. Anutufa miqimarina akiaqara arirana mina amiannoo.

16 Qinee Roomma maqannaa kootaki indaaru kamu mariafananoo sia moo fannoo qini dadaaqin角度 aiqamausa qini quqaqisee sandamafufaqa qeeqaraa kai kooti mariqiafana. Qinee Anutunara sia mina akiaqara nimiannee qidaqa.

17 Misa fufanoo Karaambaiqa kai qumee qini pooduqee marufaqa qinee kootaki kikiqamafi Yisuna ufa aiqama amiqimasee aanaamuru aiqama qimannimiafanaqa iriqa. Miqimasaafananoo Anutufa kaasau aandau ookinaanara foora qini rafieenoora foora inau.

18 Karaambaiqa fannoo oosana oosana mandainainakinaana qini mareeqeenoo nari innaaruna ququsaki amiqimasee quqaqisaannoo. Mina areenarafa naaru naaru mariani, kuqaa.

Pauroofa nimandoo ufafa.

19 Anee Pirisikira nammarifa faqa nari afaaqi Akuiraana faqa nimandaa, Ooneesifoorusafa faqa nari faiqi anaasee faqa nimandaa.

20 Erasatusafa Koorinti maqusai miqoo ka-sooinoo marinou Tarooofimusafa aurimarufaqa Mireetusa maqusaki quqaqiafana.

21 Suara aukuana aniannoo anee naaree amanamasee qafeenana ania. Eeuburusafa faqa Pudeenasafa faqa Rinusafa faqa Karaudiafa faqa maqoo maria qikaqaafasaasa faqa aiqamausa Timooti ani amandaidaqa.

22 Karaambaiqa maraquna fannoo ani faqa mariani Anutuna afaarirafa inni aiqamausa faqa mariani.

**Fúka Moodaanaki Kira Ufa Afaqínaasa Ufa
Portions of the Holy Bible in the Binumarien
language of Papua New Guinea
Buk Baibel long tokples Binumarien long Niugini**

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

PDF generated using Haiola and XeLaTeX on 18 Apr 2025 from source files dated 31 Aug 2023

4a891130-f25d-5e30-a81c-882b2e037698